

阿毗達磨集異門足論卷第十八 帳八

尊者舍利子說

唐三藏法師玄奘奉詔譯

八法品第九之一

時舍利子復告眾言具壽當知佛於八法自

善通達現等覺已為諸弟子宣說開示我等

今應和合結集佛滅度後勿有乖諍當令隨

順梵行法律久住利樂無量有情哀愍世間

諸天人眾令獲殊勝義利安樂八法云何

陀南曰

道支數取施 懈怠精進福 眾世法解脫

勝處各八種

有八道支八補特伽羅八種施八懈怠事八

精進事八福生八種眾八世法八解脫八勝

處

八道支者云何為八答一正見二正思惟三正語四正業五正命六正勤七正念八正定此八道支如前廣說

八補特伽羅者云何為八答一證預流果向二證預流果三證一來果向四證一來果五證不還果向六證不還果七證阿羅漢果向八證阿羅漢果如是八種補特伽羅如法蘊論廣說其相

八種施者云何為八答一隨至施二怖畏施三報恩施四求報施五習先施六要名施七希天施八為莊嚴心為資助心為資瑜伽為得通慧菩提涅槃上義故施云何隨至施答如有一類施隣近者施親近者施現至者謂作是念云何乞者現來至此而不施耶是名隨至施云何怖畏施答如有一類有怖故施

有畏故施由怖畏纏而行惠施彼作是念若不行施勿有如是如是衰損是名怖畏施云何報恩施答如有一類作是念言彼既曾施我如是如是物我亦應施彼如是如是物豈得彼恩而不酬報是名報恩施云何求報施答如有一類作是念言我今若施彼如是如是物彼亦當施我如是如是物期他反報而行惠施是名求報施云何習先施答如有一類作是念言我之父祖常行惠施我家長夜惠施無斷我今生在信家施家我家本來常樂布施我若不施便斷種族為護種族而行惠施是名習先施云何要名施答如有一類為得廣大妙善稱譽聲頌美名徧諸方域而行惠施是名要名施云何希天施答如有一類希求生天勝異熟果而行惠施謂我命終

當生天上由今布施受天妙樂是名希天施云何為莊嚴心為資助心為資瑜伽為得通慧菩提涅槃上義故施答如有一類作是念言我心長夜為貪瞋癡之所雜染心雜染故有情雜染心清淨故有情清淨若行惠施便發起欣欣故生喜心喜故身輕安身輕安故受樂受樂故心定心定故如實知見如實知見故生厭厭故能離離故得解脫解脫故證涅槃如是布施漸次增長諸勝妙法展轉證得菩提涅槃微妙上義世尊於此說伽陀曰

於眾相圓滿 快八 所捨離慳貪 三 施質直應時  
必獲於大果 智者善淨心 施可祠可愛  
以心清淨故 遂證得於欣 即從此欣心  
復發生勝喜 由此心喜故 又起身輕安  
從此身輕安 智者心受樂 由心受樂故

定心一境轉	依如是勝定	心淨無染濁
調順有堪能	發如實知見	由如實知見
便厭患於身	既厭患於身	智者正能離
以能遠離故	解脫貪瞋癡	智者自應知
梵行立生盡	如是大利益	應知由布施
若緣此修行	必證得常樂	

八懈怠事者云何為八具壽當知如有一類  
 依止城邑或聚落住於日初分著衣持鉢入  
 城邑等巡行乞食彼乞食時作如是念願得  
 美妙眾多飲食若不遂心便作是念我食既  
 少身力羸劣不能進修所修勝行且應偃卧  
 以自將息作是念已遂不精勤求得未得求  
 至未至求證未證是名第一懈怠事復次具  
 壽如有一類依止城邑或聚落住於日初分  
 著衣持鉢入城邑等巡行乞食彼乞食時作

如是念願得美妙眾多飲食若得遂心便作  
 是念我食既多身飽悶重不能進修所修勝  
 行且應偃卧以自將息作是念已遂不精勤  
 求得未得求至未至求證未證是名第二懈  
 怠事復次具壽如有一類晝營事業作如是  
 念我於晝時既營事業緣力勞倦今於夜分  
 不能進修所修勝行且應偃卧以自將息作  
 是念已遂不精勤求得未得求至未至求證  
 未證是名第三懈怠事復次具壽如有一類  
 期至明日作諸事業便作是念我既明日當  
 作事業不應進修所修勝行且應偃卧長養  
 身力作是念已遂不精勤求得未得求至未  
 至求證未證是名第四懈怠事復次具壽如  
 有一類晝行道路作如是念我於晝時既行  
 道路身力勞倦今於夜分不能進修所修勝

行且應偃卧以自將息作是念已遂不精勤  
求得未得求至未至求證未證是名第五懈  
怠事復次具壽如有一類期至明日當行道  
路便作是念我既明日當行道路不應進修  
所修勝行且應偃卧長養身力作是念已遂  
不精勤求得未得求至未至求證未證是名  
第六懈怠事復次具壽如有一類正為病苦  
之所嬰纏作如是念我正病苦之所嬰纏身  
力羸劣不任進修所修勝行且應偃卧以自  
將息作是念已遂不精勤求得未得求至未  
至求證未證是名第七懈怠事復次具壽如  
有一類病苦嬰纏雖愈未久作如是念我遭  
病苦之所嬰纏雖愈未久身力羸劣不任進  
修所修勝行且應偃卧以自將息作是念已  
遂不精勤求得未得求至未至求證未證是

惟八

五

名第八懈怠事如是八種名懈怠事問何緣  
此八名懈怠事答懈怠者謂懶惰由斯八事  
未生而生生已倍復增長廣大由此因緣名  
懈怠事

八精進事者云何為八具壽當知如有一類  
依止城邑或聚落住於日初分著衣持鉢入  
城邑等巡行乞食彼乞食時作如是念願得  
美妙衆多飲食若不遂心便作是念我食雖  
少而身輕利堪能進修所修勝行作是念已  
精進熾然求得未得求至未至求證未證是  
名第一精進事復次具壽如有一類依止城  
邑或聚落住於日初分著衣持鉢入城邑等  
巡行乞食彼乞食時作如是念願得美妙衆  
多飲食若得遂心便作是念我食既多身力  
強盛堪能進修所修勝行作是念已精進熾

然求得未得求至未至求證未證是名第二  
精進事復次具壽如有一類晝營事業作如  
是念我於晝時既營事業無暇修學大師聖  
教今於夜分應自策勤補先間缺作是念已  
精進熾然求得未得求至未至求證未證是  
名第三精進事復次具壽如有一類期至明  
日作諸事業便作是念我既明日當作事業  
無暇修學大師聖教今於夜分應預精勤補  
當間缺作是念已精進熾然求得未得求至  
未至求證未證是名第四精進事復次具壽  
如有一類晝行道路作如是念我於晝時既  
行道路無暇修學大師聖教今於夜分應自  
策勤補先間缺作是念已精進熾然求得未  
得求至未至求證未證是名第五精進事復  
次具壽如有一類期至明日當行道路便作

帳八

六

是念我既明日當行道路無暇修學大師聖  
教今於夜分應預精勤補當間缺作是念已  
精進熾然求得未得求至未至求證未證是  
名第六精進事復次具壽如有一類正為病  
苦之所嬰纏便作是念我既病苦之所嬰纏  
或有是處因斯病苦之所嬰纏便捨身命於  
大師教空無所得作是念已精進熾然求得  
未得求至未至求證未證是名第七精進事  
復次具壽如有一類病苦嬰纏雖愈未久作  
如是念我遭病苦之所嬰纏雖愈未久或有  
是處病苦還起因斯病苦便捨身命於大師  
教空無所得作是念已精進熾然求得未得  
求至未至求證未證是名第八精進事如是  
八種名精進事問何緣此八名精進事答精  
進者謂策勵由此八事未生而生已倍復

增長廣大由此因緣名精進事

八福生者云何爲八具壽當知如有一類施諸沙門或婆羅門貧窮苦行道行乞者苦行衣服飲食及諸香華房舍卧具并燈明等資生什物見富貴人便作是念由此布施所集善根願我來生當得如是富貴人類彼於此心若習若修若多所作由彼於心若習若修若多所作先雖愛樂下劣誼雜後便欣求勝妙寂靜彼有是處身壞命終還生人中得富貴類雖受富貴自在安樂而具尸羅心願清淨先人身中尸羅淨故是名第一福生如願生人得富貴類如是願生四天王衆天三天夜摩天覩史多天樂變化天他化自在天梵衆天應知亦爾然梵衆天有差別者應欲離欲此中是名第一乃至第八者漸次順

次相續次第數爲第一乃至第八言福生者問何故說此名爲福生答攝受福果生於此處故名福生

八種衆者云何爲八答一刹帝利衆二婆羅門衆三長者衆四沙門衆五四天王天衆六三十三天衆七魔天衆八梵天衆云何刹帝利衆答顯示彼色顯示彼蘊顯示彼部是名利帝利衆乃至梵衆廣說亦爾

八世法者云何爲八答一得二不得三毀四譽五稱六譏七苦八樂云何名得答若於可愛色聲香味觸衣服飲食卧具病緣醫藥資生什物諸得別得已得當得是名爲得云何不得答若於可愛色聲香味觸衣服飲食卧具病緣醫藥資生什物諸不得不別得不已得不當得是名不得云何名毀答諸有隱皆

不現在前不稱不讚不歎不美亦不揄揚言  
 彼信戒聞捨慧等皆不具足是名為毀云何  
 名譽答諸有隱皆不現在前稱讚歎美亦復  
 揄揚言彼信戒聞捨慧等悉皆具足是名為  
 譽云何名稱答諸不隱皆正現在前不訶不  
 毀不罵不辱稱讚歎美亦復揄揚言汝信戒  
 聞捨慧等悉皆具足故名為稱云何名譏答  
 諸不隱皆正現在前訶毀罵辱不稱不讚不  
 歎不美亦不揄揚言汝信戒聞捨慧等皆不  
 具足是名為譏云何名苦答順苦受觸所觸  
 故生身及心苦不平等受受類所攝是名為  
 苦云何名樂答順樂受觸所觸故生身及心  
 樂是平等受受類所攝是名為樂世尊於此  
 說伽陀言  
 得不得毀譽 及稱譏苦樂 無常意生欲

變壞法難保 智者如實知 現見伏生死  
 於愛非愛法 心不生欣恚 彼雖逢順違  
 而能棄伏滅 於一切解脫 至世邊彼岸  
 八解脫者云何為八答若有色觀諸色是第  
 一解脫內無色想觀外諸色是第二解脫淨  
 解脫身作證具足住是第三解脫超一切色  
 想滅有對想不思惟種種想入無邊空空無  
 邊處具足住是第四解脫超一切空無邊處  
 入無邊識識無邊處具足住是第五解脫超  
 一切識無邊處入無所有無所有處具足住  
 是第六解脫超一切無所有處入非想非非  
 想處具足住是第七解脫超一切非想非非  
 想處入想受滅身作證具足住是第八解脫  
 若有色觀諸色者謂彼於內各別色想未遠  
 離未別遠離未調伏未別調伏未滅沒未破

壞彼由於內各別色想未遠離未別遠離未調伏未別調伏未滅沒未破壞故由勝解力觀外諸色或作青瘀或作膿爛或作破壞或作離散或作豕豷或作異赤或作骸骨或作骨鎖是名若有色觀諸色第一者謂諸定中漸次順次相續次第數為第一解脫者謂此定中所有善色受想行識是名解脫內無色想觀外諸色者謂彼於內各別色想已遠離已別遠離已調伏已滅沒已破壞彼由於內各別色想已遠離已別遠離已調伏已別調伏已滅沒已破壞故由勝解力觀外諸色或作青瘀或作膿爛或作破壞或作離散或作豕豷或作異赤或作骸骨或作骨鎖是名內無色想觀外諸色第二者謂諸定中漸次順次相續次第數為第二解脫者謂

此定中所有善色受想行識是名解脫淨解脫身作證具足住者問此淨解脫加行云何修觀行者由何方便入淨解脫定答初修業者創修觀時取青樹相所謂青莖青枝青葉青華青果或取青衣青嚴具相或取所餘種種青相既取如是諸青相已由勝解力思惟想念觀察安立信解此色是某青相彼既如是由勝解力思惟想念觀察安立信解此色是某青故心便散動馳流諸相不能一趣繫念一境思惟此色是青非餘彼心散動馳流諸相不能一趣繫念一境思惟此色定是青故未能住心入淨解脫定為攝散動馳流心故於一青相繫念思惟謂此是青非非青相思惟此相精勤勇猛乃至今心相續久住由斯加行入淨解脫定精勤數習此加行已復

進修行此定方便謂於加行所引生道數習  
數修數多所作既於加行所引生道數習數  
修數多所作心便安住等住近住相續一趣  
繫念一境思惟此色定是青相由心安住等  
住近住相續一趣繫念一境思惟青相無二  
無轉便能證入淨解脫定如觀青相觀黃赤  
白隨其所應亦復如是第二者謂諸定中漸  
次順次相續次第數為第三解脫者謂此定  
中所有善色受想行識是名解脫超一切色  
想者云何色想答眼識身相應諸想等想性  
現想性已想性已現想性當想性當現想性  
是名色想復次有說五識身相應諸想等想  
乃至廣說是名色想今此義中眼識身相應  
諸想等想乃至廣說是名色想入此定時於  
彼色想皆能超越平等超越最極超越是故

第八

十一

說超一切色想滅有對想者云何有對想答  
四識身相應諸想等想乃至廣說是名有對  
想復次有說五識身相應諸想等想乃至廣  
說是名有對想復次有說瞋恚相應諸想等  
想乃至廣說是名有對想今此義中四識身  
相應諸想等想乃至廣說是名有對想入此  
定時彼有對想已斷已徧知已遠離已別遠  
離已調伏已別調伏已滅沒已破壞是故說  
為滅有對想不思惟種種想者云何種種想  
答有覆纏者所有染汚色想聲想香想味想  
觸想諸所有想若不善諸所有想若非理所  
引諸所有想能障礙定如是一切名種種想  
入此定時於種種想不引發不隨引發不等  
引發不思惟不已思惟不當思惟由斯故說  
不思惟種種想入無邊空空無邊處具足住

者問此空無邊處解脫加行云何修觀行者由何方便入空無邊處解脫定答初修業者創修觀時先應思惟第四靜慮為麤苦障後應思惟空無邊處為靜妙離彼既思惟第四靜慮為麤苦障亦復思惟空無邊處為靜妙離故心便散動馳流諸相不能一趣繫念一境相續思惟空無邊處彼心散動馳流諸相不能一趣繫念一境相續思惟空無邊處故未能住心入空無邊處解脫定為攝散動馳流心故專繫念思惟空無邊處相思惟此相精勤勇猛乃至令心相續久住由斯加行入空無邊處解脫定精勤數習此加行已復進修行此定方便謂於加行所引生道數習數修數多所作既於加行所引生道數習數修數多所作心便安住等住近住相續一趣繫

惟八

十二

念一境思惟此是空無邊處由心安住等住近住相續一趣繫念一境思惟如是空無邊處無二無轉便能證入空無邊處解脫定第四者謂諸定中漸次順次相續次第數為第四解脫者謂此定中所有善受想行識皆名解脫超一切空無邊處者云何超一切空無邊處答將欲趣入識無邊處時於一切空無邊處想皆能超越平等超越最極超越是故說為超一切空無邊處入無邊識識無邊處具足住者問此識無邊處解脫加行云何修觀行者由何方便入識無邊處解脫定答初修業者創修觀時先應思惟空無邊處為麤苦障後應思惟識無邊處為靜妙離彼既思惟空無邊處為苦麤障亦復思惟識無邊處為靜妙離故心便散動馳流諸相不能一趣

繫念一境相續思惟識無邊處彼心散動馳流諸相不能一趣繫念一境相續思惟識無邊處故未能住心入識無邊處解脫定為攝散動馳流心故專繫念思惟識無邊處相思惟此相精勤勇猛乃至令心相續久住由斯卷八加行入識無邊處解脫定精勤數習此加行十三已復進修行此定方便謂於加行所引生道數習數修數多所作既於加行所引生道數習數修數多所作心便安住等住近住相續一趣繫念一境思惟此是識無邊處由心安住等住近住相續一趣繫念一境思惟如是識無邊處無二無轉便能證入識無邊處解脫定第五者謂諸定中漸次順次相續次第數為第五解脫者謂此定中所有善受想行識皆名解脫超一切識無邊處者云何超一

切識無邊處答將欲趣入無所有處時於一切識無邊處想皆能超越平等超越最極超越是故說為超一切識無邊處入無所有無所有處具足住者問此無所有處解脫加行云何修觀行者由何方便入無所有處解脫定答初修業者創修觀時先應思惟識無邊處為苦羸障後應思惟無所有處為靜妙離彼既思惟識無邊處為苦羸障亦復思惟無所有處為靜妙離故心便散動馳流諸相不能一趣繫念一境相續思惟無所有處彼心散動馳流諸相不能一趣繫念一境相續思惟無所有處故未能住心入無所有處解脫定為攝散動馳流心故專繫念思惟無所有處相思惟此相精勤勇猛乃至令心相續久住由斯加行入無所有處解脫定精勤數習

此加行已復進修行此定方便謂於加行所引生道數習數修數多所作既於加行所引生道數習數修數多所作心便安住等住近住相續一趣繫念一境思惟此是無所有處由心安住等住近住相續一趣繫念一境思惟如是無所有處無二無轉便能證入無所有處解脫定第六者謂諸定中漸次順次相續次第數為第六解脫者謂此定中所有善受想行識皆名解脫超一切無所有處者云何超一切無所有處答將欲趣入非想非非想處時於一切無所有處皆能超越平等超越最極超越是故說為超一切無所有處入非想非非想處具足住者問此非想非非想處解脫加行云何修觀行者由何方便入非想非非想處解脫定答初修業者創修觀時

先應思惟無所有處為苦麤障後應思惟非想非非想處為靜妙離彼既思惟無所有處為苦麤障亦復思惟非想非非想處為靜妙離故心便散動馳流諸相不能一趣繫念一境相續思惟非想非非想處彼心散動馳流諸相不能一趣繫念一境相續思惟非想非非想處故未能住心入非想非非想處解脫定為攝散動馳流心故專繫念思惟非想非非想處相思惟此相精勤勇猛乃至令心相續久住由斯加行入非想非非想處解脫定精勤數習此加行已復進修行此定方便謂於加行所引生道數習數修數多所作既於加行所引生道數習數修數多所作心便安住等住近住相續一趣繫念一境思惟此是非想非非想處由心安住等住近住相續一

趣繫念一境思惟如是非想非非想處無二  
 無轉便能證入非想非非想處解脫定第七  
 者謂諸定中漸次順次相續次第數為第七  
 解脫者謂此定中所有善受想行識皆名解  
 脫超一切非想非非想處者云何超一切非  
 想非非想處答將欲趣入想受滅解脫時於  
 一切非想非非想處想皆能超越平等超越  
 最極超越是故說為超一切非想非非想處  
 入想受滅身作證具足住者問此想受滅解  
 脫加行云何修觀行者由何方便入想受滅  
 解脫定答初修業者創修觀時於一切行不  
 願造作不欲思覺而入於定但作是念云何  
 當今未生想受暫時不生已生想受暫時息  
 滅彼於諸行不願造作不欲思覺而入於定  
 但作是念云何當今未生想受暫時不生已

生想受暫時息滅故隨心所願有時能令未  
 生想受暫時不生已生想受暫時息滅齊此  
 名入想受滅解脫定第八者謂諸定中漸次  
 順次相續次第數為第八解脫者謂此定中  
 諸解脫異解脫異極解脫已解脫當解脫是  
 名解脫復次若法想微細為因想微細為等  
 無間由想不和合義非不成就義是名解脫  
 此中想受滅解脫定者云何想受滅云何想  
 受滅解脫云何想受滅解脫定而說想受滅  
 解脫定耶答想受滅者謂想及受滅寂靜沒  
 是名想受滅俱八想受滅解脫者謂想受滅諸解  
 脫異解脫異極解脫已解脫當解脫是名想  
 受滅解脫想受滅解脫定者謂想受滅及想  
 受滅解脫不隱不背現前自在身所證得是  
 名想受滅解脫定

阿毗達磨集異門足論卷第十八 說一切有部

音釋

瑜伽 梵語也此云相應  
徒覽切  
骸 容朱切  
百骸也  
瘖 依據切  
啄 竹角切  
鳥啄也  
敢